

# 1 Korin

<sup>1</sup> Aya Pol, Negur nê oroyam Kristus Jesus nê aposel wõ auf nigin iweignan, neda turada Sostenes ado,

<sup>2</sup> Korin oun Negur nê sios ã bun, pas enei matotkeneik. ã Kristus Jesus bun fateuleĩ fen, fateul ubodõgouf nigin iweignein, are tamo kayau ganan fire firen difar fen, neda Odug Jesus Kristus, idi neid Odug ado neda Odug ã yana dalesedig anidi geid weim iweignein.

<sup>3</sup> Negur neda Tamada ado Odug Jesus Kristus neid wau ifenêya ado wau inosiya, ã bun ibodõf.

## *Pol Negur De Fiyen*

<sup>4</sup> Aya wededem ã nigin Negur de afiyēdig, ere nigin, yogon wau ifenêya Kristus Jesus bun ã ifenein.

<sup>5</sup> Ere nigin, Jesus bunem erēb erēb ganān bun, ã kisi feleya ifenein, are āgenei wogõ ganān ado keleĩ ganān bun,

<sup>6</sup> ere nigin, Kristus nigin neda wogõya, ã bun megeir ifaren.

<sup>7</sup> Anĩ nigin, ã neda Odug Jesus Kristus yaorouf nigin wauĩ fatuk unog fen, tarig mog, ã Awa Uur nē ege luwa taka to lau gef.

<sup>8</sup> Jesus ã total irouyeik ile, idikeleya bun ilauf, anĩ bunem, neda Odug Jesus Kristus isiyouf nē naa bun, ã bouweĩ od sãf.

<sup>9</sup> Negur ã, yogon Naal Jesus Kristus, neda Odug geid, ã nigal gouf nigin iweignein, ã ereb yef, de age foug bagai.

### *Sios Atun Fara Fiya*

<sup>10</sup> Turau tar, aya neda Odug Jesus Kristus yana bunem total bagai arokeneik, are ã atun fara fiya taka to ibodõf nigin, ã ganan abob nigin wauĩ tekelei yen ken, ã wauĩ ado kisi tekelei bagai ubodõgouf.

<sup>11</sup> Neu turau tar, tunĩ Kloe nẽ ibor bun tamal dirokanan, are ã atun luwa irouya ibodok.

<sup>12</sup> Aya enei wogõ auf, are eig fiya, ã atun takam irok, “Aya Pol dõ afef,” takam irok, “Aya Apolos dõ afef,” takam irok, “Aya Pita dõ afef,” takag irok, “Aya Kristus dõ afef.”

<sup>13</sup> Kristus ã fara furu fen de? Aya Pol ã, ã nigin aa tetek bun dun de? ã aya Pol yanau bunem naan digunein de?

<sup>14</sup> Aya Negur de afiyek, are aya ã taka to naan agunen, Krispus ado Gaius dogol naan agunẽdin.

<sup>15</sup> Anĩ nigin, taka nem to irõf, “Aya Pol yana nem naan agun.”

<sup>16</sup> (Momoi, aya Stefanus nẽ ibor tareg naan agunẽdin, anĩ teten, takag naan agunen be anĩ, to kisi afef.)

<sup>17</sup> Ere nigin, Kristus ã aya naan agunẽdiyof nigin to sur fiyan, anĩ ere, biya od wogõ auf nigin sur fiyan, are Kristus nẽ aa tetek nẽ megeir to yalelauf nigin, tamo nẽ kisi biya wogõya anĩ bunem sã.

### *Kristus ã, Negur Nẽ Kisi Biya Ado Megeir*

<sup>18</sup> Jesus aa tetek bun laa fen ya od anĩ, idi inanakelediyouf anidi bun are neneya, anĩ ere, ada isennadaf bun, od are Negur nẽ megeir.

<sup>19</sup> Ere nigin, Negur nẽ Itotoya bun eig ye irok:  
 “Aya tamo kisi biya adodo neid kisi biya daũ afalauf,  
 aya tamo keleĩ odug adodo neid keleĩ alelauf.”\*

<sup>20</sup> Tamo kisi biya adodo nain? Tamo keleĩ odug adodo nain? Sain enei nẽ keleĩ yaleya nigin luwa irouya tamo nain? Negur ĩ tenebur enei nẽ kisi biya anĩ to neneya inon de?

<sup>21</sup> Negur nẽ kisi biya bunem, tenebur tamo dogo neid kisi biya anim, Negur nigin to kelein, anĩ nigin, neneya od dedig anĩ wogõ taudig bunem, idi momoi def anidi isennēdiya nigin, Negur wau al fen.

<sup>22</sup> Juda idi memelik nẽ uris dilouf nigin dirõdig, Grik idi kisi biya anĩ dimirēdig.

<sup>23</sup> Anĩ ere, ada Kristus aa tetek bun dun anĩ wogõ taudig, od anĩ Juda idi bun, ye tũ fiya od, haiden idi bun, are neneya od,

<sup>24</sup> anĩ ere, idi Juda ado Grik Negurem iweignēdin anidi bun, Kristus ĩ Negur nẽ megeir, Negur nẽ kisi biya.

<sup>25</sup> Ere nigin, Negur nẽ neneya kisi are, tamo nẽ kisi biya wal fiya, Negur nẽ folo reya are, tamo nẽ megeir wal fiya.

<sup>26</sup> Turau tar, ã naig be fiya ufareg mog, ã iweignein anĩ kisi gouf. Æ musei sam, tamo nẽ keleĩ bunem, kisi biya ado wowã gen. Musei sam

---

\* **1:19:** Asaia 29:14

total ado wowã gen. Musei sam yeneĩ ado wowã gen.

<sup>27</sup> Anĩ ere, Negur kisi biya adodo mama ifenēdiyof nigin, tenebur enei nē neneya igirnēdin. Negur ĩ megeir adodo mama ifenēdiyof nigin, tenebur enei nē folo reya igirnēdin.

<sup>28</sup> Negur ĩ tenebur enei nē yeneid sāsã, meleid irim lai difedig ado, ereb taka sã dedig anĩ igirnēdin, are ereb ado dedig anĩ, yana sa kalauf nigin age fen,

<sup>29</sup> anĩ bunem, Negur mala bun, taka nem yogo yana to yalesauf.

<sup>30</sup> Negur nigin ã Kristus Jesus bun ubodōgef, Jesus ĩ ada nigin Negur bunem kisi biya wõ yen, are ada ĩ bunem madur bagai, fateul wowã tau fen, isennēya talen.

<sup>31</sup> Anĩ nigin, Negur nē Itotoya bun eig ye irok, “Tamo ĩ yogo yana yalesef are, Odug ereb age fen anĩ nigin yana yalesauf.”†

## 2

<sup>1</sup> Turau tar, aya ã gein asi fen, Negur yaor afouf nigin wogõ ayein sain bun, aya od biya odug nem be, kisi biya odug nem to wogõ aun.

<sup>2</sup> Ere nigin, aya ã geid tabodon sain, aya ereb ereb ganan wederou tu kel fen, Jesus Kristus ado, ĩ aa tetek bun laa fen anĩ dogol kisi afouf nigin kisi afokelen.

<sup>3</sup> Sain aya ã gein asin, aya totalou sã, fatuk bagai kumĩ tererẽ aun.

---

† **1:31:** Jeremaia 9:24

<sup>4</sup> Neu od ado neu wogõya, are kisi biya nẽ, wauĩ faleiya nẽ od bunem sã, Awa Uur nẽ megeir nẽ ifelnẽya bunem,

<sup>5</sup> are āgenei momoiya, tamo nẽ kisi biya bun to ibodõf, Negur nẽ megeir bun ibodõf nigin age afen.

### *Awa Uur Nẽ Kisi Biya*

<sup>6</sup> Ada kisi biya nẽ od atĩya anidi atun wogõ taudig, anĩ ere, kisi biya anĩ, are sain enei nẽ sã, sain enei nẽ uyu irouya, fau inanakelediyouf anidi neid sã.

<sup>7</sup> Anĩ ere, ada, Negur nẽ waa kisi biya anĩ, wogõ taudig, are iminẽyan ibodok, teneub kare fiya sã mog Negur neda fula fiya medeĩya nigin mogo igirin anĩ.

<sup>8</sup> Sain enei nẽ uyu irouya takam, kisi biya anĩ to keleim. Idi kisi biya anĩ keleim are, idi fula fiya medeĩya nẽ Odug aa tetek bun to dum.

<sup>9</sup> Anĩ ere, Negur nẽ Itotoya eig ye irok kilei:  
 “Negur nigin waud laa fedig idi nigin Negur  
 dodok fen anĩ,  
 malam taka to ilen,  
 weder takam to karĩ yen,  
 kisi takam to fokõ yen.”\*

<sup>10</sup> Anĩ ere, Negur yogon Awa Uurem ada bun anĩ yaor fen.

Awa Uur ĩ ereb ereb ganan fai yeledig, Negur nẽ ereb ereb ilon bargaig fai yeledig.

<sup>11</sup> Tamo atun aim, tamo taka nẽ kisi keleĩ? Are tamo anĩ nẽ uurem dogol keleĩ. Age fiya bagai,

---

\* **2:9:** Asaia 64:4

tamo takam Negur nē kisi keleĩ sã, Negur nē Awa Uurem dogol keleĩ.

<sup>12</sup> Ada teneub enei nē uur to talen, anĩ ere, ada Awa Uur Negur bun tamal talen, are ereb Negur wau sã ifanadan anĩ, ada keleĩ youf nigin age tafen.

<sup>13</sup> Ada enei anĩ wogõ taudig, are tamo nē kisi biya bunem od difelnadan anĩ bunem sã, are od Awa Uurem ifelnadan anĩ bunem. Ada Awa Uur nē od bunem Awa Uur nē kisi wogõ taudig.

<sup>14</sup> Tamo Awa Uur sã ĩ, Negur nē Awa Uur bun tamal ereb isif anĩ to yale iroudig, ere nigin, yogon kariya bun, are neneya. ĩ anĩ keleĩa nigin kisi feleya sã, ere nigin, are Awa Uur adodom dogol es difedig.

<sup>15</sup> Awa Uur ado tamo ĩ, ereb ereb ganan nigin es fedidig, anĩ ere, ĩ yogo taka nem to es fiyēf.

<sup>16</sup> Negur nē Itotoya eig ye irok:

“Aim Odug nē kisi kelei ken,

ĩ faded fiyēf?”†

Anĩ ere, ada Kristus nē kisi ado.

### 3

#### *Sios Bun Fara Fiya*

<sup>1</sup> Turau tar, aya ã momoiya nigin atĩa gen to ayein, ã teneub enei nē dogol, ã Kristus bun momou gen ayein.

<sup>2</sup> Aya su afenein, saaf total anĩ to afenein, ere nigin, ã anĩ nigin to saika gen. Momoi, ã gamag fau to saika gef.

---

† **2:16:** Asaia 40:13

<sup>3</sup> ã fau teneub enei nẽ dogol ubodõgef. ã atun, kiyeĩ ado luwa irouya ibodok, anĩ nigin, ã fau teneub enei nẽ sã de? ã teneub enei nẽ tamo gen to ago gef de?

<sup>4</sup> Takam irok, “Aya Pol dõ afef,” takam irok, “Aya Apolos dõ afef,” ago gouf are, ã teneub enei nẽ tamo sã de?

<sup>5</sup> Agef ilauf are, Apolos ã ai? Pol ã ai? Amã Negur nẽ kabĩ tamo dogol, amã bunem ã momoi gen, are Odugem kabĩ morou morou ifanaman kilei.

<sup>6</sup> Ayam faat atenẽ di, Apolosem naan fen, anĩ ere, Negurem odugouf nigin age fen.

<sup>7</sup> Anĩ nigin, faat itenẽya tamo ado naan fiya tamo are ege, anĩ ere, Negur ã yogo dogol odug, ere nigin, ã erob odugouf nigin age fedig.

<sup>8</sup> Faat itenẽya tamo ado naan fiya tamo, idi karĩya tekelei ado. Negur idi mugu mugu kabĩ dalen kilei, mala solo ifenẽdiyof.

<sup>9</sup> Ere nigin, amã Negur nẽ kabĩ tura tar, ã Negur nẽ kabĩ akor, Negur nẽ fõ.

<sup>10</sup> Negur ã aya wau ifenẽya ifanan anĩ bunem, aya fõ inoya keleĩ biya tamo gen, fõ inoya nigin gariya anon, age afe di, taka nem anĩ teten fõ inof. Anĩ ere, tamo mugu mugu el de, lo de fen, fõ dinouf nigin lo difalauf.

<sup>11</sup> Ere nigin, fõ gariya inon, are Jesus Kristus, taka nem fõ gariya fire inoya kisi feleya sã.

<sup>12</sup> Tamo takam fõ gariya enei teten, gol, silwa, mein moni odug, aa, yeye be, wit turu nem fõ inouf are,

<sup>13</sup> yogon kabĩ naig be fiya are yaorouf, ere nigin, Kristus nẽ naa bun, anĩ lalan bun irousi

inouf. Are yã ado wõ ye di, yã anim tamo mugu mugu nẽ kabĩ nẽ kaũ es foug.

<sup>14</sup> Ì ereb inon anĩ ifarlauf are, ì yogon mala solo yalouf.

<sup>15</sup> Ì ereb inon anĩ isaikalauf are, ì agogon youf. Ì yogo Negurem kel yalouf, anĩ ere, ì yã malan tamal ulõ yesiya tamo gen ibodõf.

<sup>16</sup> Æ aug are Negur nẽ tempel, Negur nẽ Awa Uur ã namein ibodõdig anĩ, ã to keleĩ de?

<sup>17</sup> Taka ì Negur nẽ tempel daũ foug are, Negur ì tamo anĩ daũf irailauf, ere nigin, Negur nẽ tempel are fateul, are ã tempel anĩ.

<sup>18</sup> Æ aug to udegnẽgouf. Ægenei taka ì, gama sain enei nẽ keleĩ bunem, aya kisi biya ado yef are, ì neneya wõ youf bagai, are ì kisi biya ado wõ youf nigin age foug.

<sup>19</sup> Ere nigin, Negur mala bun, teneub enei nẽ kisi biya are neneya. Negur nẽ Itotoya eig ye irok kilei, “Negur ì, kisi biya adodo tamo dogo neid keleĩ anim kor bun dilelel mog, gei fedidig,”\*

<sup>20</sup> Negur nẽ Itotoya takag irok, “Odug ì keleĩ, kisi biya adodo tamo neid kisi, are ege.”†

<sup>21</sup> Anĩ nigin, tamo yeneid to walesagauf! Ere nigin, ereb ereb ganan are ãgenei,

<sup>22</sup> Pol, Apolos, Pita, teneub enei, mata ibodõya, laa, gama be, dumen, ereb ereb ganan, are ãgenei,

<sup>23</sup> ã Kristus nẽ, Kristus ì Negur nẽ.

---

\* **3:19:** Job 5:13 † **3:20:** Sam 94:11

## 4

### *Kristus Nē Aposel Tar*

<sup>1</sup> Anī nigin, tamo idi, amā nigin, idi Kristus nē kabī tamo tar, Negur nē waa lo fiya nigin idi imeid bun inon de fen, kisi difouf.

<sup>2</sup> Tamo idi ereb lo difouf nigin imeid bun inon anidi, dogo neid marau sigor dō difef dile, age difouf anī, marau orof.

<sup>3</sup> Ā aya es wiyagef be, tamo nē kot bun es difiyaf, are aya to sii fiyaf. Momoi, aya yug nigineg to es afedig.

<sup>4</sup> Neu kisi are karētut, anī ere, anim aya mosor sã to auf. Odug im aya es fiyaf.

<sup>5</sup> Anī nigin, es fiya nē sain fau wōya sã mog, to es gouf. Tari gef uleg, Odug isiyouf bun. Ī ereb gugum bun iminek anī lalan bun irou isi fen, tamo neid waud bun kisi ibodok anī yaor fouf. Sain anī bun, idi mugu mugu Negur bun yana odug dalouf.

<sup>6</sup> Turau tar, gama aya, āgenei biya fiya nigin, ereb enei arokenein, aya yug ado Apolos bunem, afelnein, anī bunem, ā wogōya eig fiya nē gariya, are amā bun keleī walogouf, “Itotoya bun yenek anī to ufodulagauf.” Ā anī keleī youf are, ā tamo taka anī yana waleseg fen, taka to lai gouf.

<sup>7</sup> Ere nigin, aim ō, taka wal fiya inenok? Ō mogo ado, ere anī ō to walen? Ō mogo anī walen ouf are, ere nigin ō anī to walen gen, ogo yanã walesef?

<sup>8</sup> Ereb ā oroyeik ganan ā mogo ado. Ā mogo safina kisi feleya bagai ubodōgef. Ā mogo king wowã gen, are amā geid sã. Amã ā geid king

wowã tauf nigin, ã momoi bagai king wowã gem anĩ, aya orouf bagai.

<sup>9</sup> Ere nigin, aya kisi afef, Negur ĩ amã aposel, tamo yukesiya nigin dinenēdig gen, tamo dilouf nigin, gĩ bun idikeleyan bagai inenaman. Saa teneub ado, are tamo ado engel meleid bun, amã fele difamãf nigin inoman.

<sup>10</sup> Amã Kristus nigin neneya mabodok, anĩ ere, ã Kristus bun kisi biya bagai ubodōgef. Amã total sã mabodok, anĩ ere, ã total ubodōgef. Ā yeneĩ dalesedig, amã yanamã to dalesedig.

<sup>11</sup> Kulu nem isi gama sain enei bun, amã naũ ado naan ail mayok, amã gabar masasak mafilaik, amã darau difanamak, amã fõ sã.

<sup>12</sup> Amã mug imamam kabĩ total maledig. Sain amã disisnamak are, amã el fiya mafenēdidig. Amã darau difanamak are, darau anĩ faali mafedig.

<sup>13</sup> Bouwamã bun od duk sain, amã molol nem od solo mafedig. Mabodok masi gama sain enei bun, amã teneub enei nē ido gen ado, ereb ereb ganamã nē moto gen wõ maun.

<sup>14</sup> Aya ã mama ifeneĩya nigin enei to atotof, anĩ ere, ã neu kesu tar oboiyou gen wedereĩ arouf nigin age afef.

<sup>15</sup> Ere nigin, Kristus bun, ã ten tausen kulat tamo ado, anĩ ere, ã temeĩ musei sã, are aya Kristus Jesus bun biya od bunem temeĩ wõ aun.

<sup>16</sup> Anĩ nigin, aya ã madē wiyagauf nigin total bagai arokeneik.

<sup>17</sup> Gariya enei nigin, aya neu kesu Timoti, ĩ Odug bun aya oboiyou ado dõ fiya biya, ã gein

sur afef. Im Kristus Jesus bun, neu mata ibodōya nē suma anī, ā wedereī fokō fouf, are aya modoū ganan sios ganan bun afelnēdidig age fiya bagai.

<sup>18</sup> Ā tunī, Pol ī amā garan to isiyouf ge fen, ā aug yeneī walesegen.

<sup>19</sup> Anī ere, Odug orouf are, aya kaisā bagai ā gein asiyouf, age afe fen, aya dogo yeneid yaleseya tamo eneidi naig de wogō def anī sã, anī ere, ereb megeir idi ado anī fele afouf.

<sup>20</sup> Ere nigin, Negur nē tano are ege wogōya nē sã, are megeir nē.

<sup>21</sup> Ere anī ā oroyeik? Aya wagagã yeīya nigin tibog ado ā gein asiyouf de, wau laa fiya ado molol bunem asiyouf?

## 5

### *Tureī Noli Tobonunã Ado Walelnēgouf!*

<sup>1</sup> Ā atun, noli tobonunã age fiya, are haiden atuneg to wō yedig anī, ibodok yeya karī aun. Tamo taka ī tama nē kayau we fedig.

<sup>2</sup> Age fe di, ā aug selī wabigedig! Age fiya ban, ā wauī gudūf fen, tamo tobonunã enei inof anī, āgenei uyu kū fiya bun walelnēgouf, are deuf.

<sup>3</sup> Aya bouwau ā geid to ibodok, anī ere, uur bun are, aya ā geid tabodok. Aya ā geid ibodōya gen, tamo enei age fen, are ī mogo es afiyen.

<sup>4</sup> Ā neda Odug Jesus yana bunem guru gouf bun, aya uur bun ā geid tabodōf, are neda Odug Jesus nē megeir ibodōf sain bun,

<sup>5</sup> tamo enei Satan ima bun unenēg, anī bunem, mosor nē bouwa daūf iraile fen, Odug nē naa bun yogon uur isennēya yalouf.

<sup>6</sup> ã yeneĩ yaleseya are to biya. Yis naal bagai flawa obu namen kabĩ yaledig anĩ, ã to keleĩ de?

<sup>7</sup> ã flawa mata yis sã gen wõ gouf nigin, yis tubu anĩ waleleg, are ã anĩ flawa mata yis sã. Ere nigin, Kristus, neda Pasa naa nẽ sipsip naal, sesewi difiyen.

<sup>8</sup> Anĩ nigin, ada Pasa Sifa naa anĩ tarouwauf, are yis tubu, sesen ado to biya nẽ yis bunem sã, anĩ ere, bret yis sã, karëtut ado momoi nẽ bret bunem age tafouf.

<sup>9</sup> Aya ã noli tobonunã dinodig tamo kayau geid to nigal gouf nigin, neu pas mogo atotkenein,

<sup>10</sup> anĩ ere, aya teneub enei nẽ tamo kayau geid to nigal gouf nigin to orok, are idi noli tobonunã, er eb er eb nigin akorouya, idegẽya bunem taka nẽ safina bẽ yaleya be, idegẽya waitou yana yaleseya age difedig. ã idi geid to nigal gouf are, ã teneub enei utorõgouf.

<sup>11</sup> Anĩ ere, gama aya ã bun atotof are, ã taka ã yogo nigin tura ye fen, noli tobonunã, er eb er eb nigin akorouya, idegẽya waitou yana yaleseya, bou yũya od wogõya, naan yõya be, idegẽya bunem taka nẽ safina bẽ yaleya age fedig, ã weim to nigal gouf. Tamo age fiya ado weim saafeg to wãgauf.

<sup>12</sup> Ere nigin aya idi sios mayarẽ difaref anĩ es afediyouf? Are, idi sios namen difaref anĩ ã to es wiyẽdigef de?

<sup>13</sup> Negur idi sios mayarẽ difaref anĩ es fediyouf. Are Negur nẽ Itotoya bun eig ye irok kilei, “ã atun

tamo sane anĩ walelnẽgouf.”\*

## 6

### *Momoiya Tamo Kayau Atun Kot Fiya*

<sup>1</sup> ãgenei takam, taka ado fefuya yenẽf are, ere nigin ã Negur nẽ tamo kayau wagedin irouleya ban, ã idi momoiya sã anidi bun, mama sã gen es fiya nigin irouledig?

<sup>2</sup> Are Negur nẽ tamo kayau teneub enei es difouf anĩ, ã to keleĩ de? ã teneub enei es gouf are, ã morõ naal bagai es fiya nigin kisi feleya sã de?

<sup>3</sup> Are amã engel es mafediyouf anĩ, ã to keleĩ de? Age fouf are, mata ibodõya enei nẽ morõ es fiya nigin naig fiyauf?

<sup>4</sup> Anĩ nigin, ã teneub enei nẽ morõ age fediya nigin fefuya adouf are, ã haiden idi, sios bun tamo yeneid sã anidi, es fiya tamo nigin ugirnẽdigef de?

<sup>5</sup> Aya ã mama yeĩf nigin od enei orok. Are ã atun, momoiya tamo kayau fefuya idi atun ibodok anĩ, es fiya nigin kisi biya ado tamo taka sã de?

<sup>6</sup> Anĩ ere, momoiya tamo takam tura taka kiwai ifen ken, kot bun iledig, are enei momoiya sã anidi wagedin irouledig.

<sup>7</sup> Momoi bagai, ã atun abob nigin kot bun fefuya ibodok anim, ã mogo kuku gen anĩ yaoref. Ere nigin ã idi to utornẽdige di, sane diyeyĩf? Ere nigin ã idi to utornẽdige di, didegneĩf?

<sup>8</sup> Age fiya ban, ã aug udegẽg fen, sane ago gedig, are ã tureĩ tar bun enei ago gedig.

\* **5:13:** Diuteronomi 17:7; 19:19; 21:21; 22:21, 24; 24:7

<sup>9</sup> Tamo tobonunã sesen idi, Negur nê tano to akorouf anĩ, ã to keleĩ de? Are ã idi to utornêdige di, didegneĩf. Idi noli tobonunã dinodig, idi idegêya waitou yana dalesedig, idi seseirã tobonunã dinodig, tamo idi bouweid na nê sur difedig, tamo tutur, kayau tutur noli tobonunã dinodig,

<sup>10</sup> idi bẽ daledig, idi erab erab safina nigin akorou dedig, idi naan dōdig, idi bou yũya od wogō dedig, idi idegêya bunem taka nê safina daledig anidi ganam, Negur nê tano to akorouf.

<sup>11</sup> Are ã tunĩ age fiya anĩ ago gedig. Anĩ ere, ã mosor bun tamal kulo yein, are ã fateul inenein, are ã, Odug Jesus Kristus yana bun ado neda Negur nê Awa Uur bunem, Negur mala bun madur bagai wowã gen.

### *Noli Tobonunã*

<sup>12</sup> Taka irōf, “Aya erab erab ganam nigin sã age afeid kisi feleya.” Are de momoi, anĩ ere, erab erab ganam to isennadauf. Aya erab erab ganam nigin sã age afeid kisi feleya, anĩ ere, aya erab takam to irouna di, ferfer abodōf.

<sup>13</sup> Taka irōf, “Saaf are te guroub nê, te guroub are saaf nê.” Anĩ ere, Negur anĩ ganam daũ falauf. Bouwa are noli tobonunã nê sã, anĩ ere, Odug nê, are Odug ã bouwa anĩ nê.

<sup>14</sup> Are, Negur yogon megeir bunem Odug laa bun tamal yalesnen, are adag ã yalesnadauf.

<sup>15</sup> ã bouweĩ are, Kristus yogo bouwa nê tunĩ anĩ ã to keleĩ de? Age fiyauf are, aya Kristus bouwa nê tunĩ ale fen, kayau bouwa na sur fedig ado bagu afouf de? Sã bagai!

<sup>16</sup> Tamo ï yogo, kayau taka bouwa na nê sur fedig ado bagu difouf are, ï kayau anï ado bouwa tekelei youf anï, ã to keleï de? Ere nigin, Negur nê Itotoya bun eig ye irok, “Idi urom bouweid tekelei youf.”\*

<sup>17</sup> Anï ere, taka ï yogo Odug ado bagu difouf are, ï uur bun Odug ado tekelei youf.

<sup>18</sup> Noli tobonunã bun tamal uyagauf. Mosor tunï ganan tamo taka inof, are ï yogo bouwa serê inof, anï ere, taka ï yogon bouwam noli mosor inof, are ï yogo bouwa bun mosor inof.

<sup>19</sup> ã bouweï are Awa Uur Fateul nê tempel, Awa Uur Fateul are ã namein ibodok anï Negur bun tamal walegen are, ã to keleï de? ã aug, ãgenei sã,

<sup>20</sup> ere nigin, ã mala odugem na yaleyeyin. Anï nigin, bouweï anim Negur yana walesagauf.

## 7

### *Tamo Kayau Ado Bagu Fiya Nigin*

<sup>1</sup> Gama od anï ã utotogen nigin arokeneik, tamo ï kayau to yalouf, are deuf.

<sup>2</sup> Anï ere, noli tobonunã musei bagai ibodok nigin, are tamo mugu mugu ï yogon kayau adouf, are kayau mugu mugu ï yogon tamo adouf.

<sup>3</sup> Tamo ï yogon bouwa nigin, yogon kayau to katũ fiyêf, age fiya gen, kayau ïg yogon bouwa nigin yogon tamo to katũ fiyêf.

<sup>4</sup> Kayau ï yogon bouwa nê mudur to ibodõf, are yogon tamo nê, age fiya gen, tamo ï yogon bouwa nê mudur to ibodõf, are yogon kayau nê.

---

\* **6:16:** Jenesis 2:24

<sup>5</sup> ã abob nigin bouweĩ to katũ gouf, anĩ ere, ã kosẽ gouf nigin, sain naal bagai yo ge fen, bouweĩ katũ gouf, are kisi falauf. Agog fen, ã bouweĩ kulatun fiya anĩ, malai nigin, are Satanem to kisi yeĩf nigin, baban ã bouweĩ bagu gouf.

<sup>6</sup> Aya od enei karĩ gouf nigin orok, are itãfiya sã.

<sup>7</sup> Tamo ganan aya gen dibodok, are aya orouf. Anĩ ere, tamo mugu mugu idi, Negur bun dogo neid ege luwa dalef, taka ege luwa enei, taka ege luwa anĩ.

<sup>8</sup> Anĩ ere, aya kayau tamo yaleya sã, tamo kayau yaleya sã ado, waab arokenẽdif, are idi aya gen age de dibodok dilauf, are deuf.

<sup>9</sup> Anĩ ere, idi dogo bouweid nigin kulatun fiya kisi feleya sãf are, tamo idi kayau dalouf, kayau idi tamo dalouf, ere nigin, noli kisi waud bun yã gen bobo reya anĩ ban, tamo idi kayau yaleya, kayau idi tamo yaleya are deuf.

<sup>10</sup> Tamo idi kayau adodo, kayau idi tamo adodo bun, aya od enei arokenẽdif, are ayam sã, Odugem. Are kayau ã ne tamo to itornẽf.

<sup>11</sup> Anĩ ere, kayau ã tamo itornẽf are, ã tamo taka to yalouf be, are ã yogon tamo ado komo difouf. Are tamo ã yogon kayau to iru irailauf.

<sup>12</sup> ã tunĩ ganan bun, aya od enei arokenẽdif, are ayam, Odugem sã. Tura taka ã kayau ado, are kayau ã momoiya sã, anĩ ere, ã tamo ado ibodõya nigin oro fouf are, tamo ã kayau anĩ to iru irailauf.

<sup>13</sup> Kayau taka ã tamo ado, are tamo ã momoiya sã, anĩ ere, ã kayau ado ibodõya nigin oro fouf are, kayau ã tamo anĩ to iru irailauf.

<sup>14</sup> Ere nigin, tamo momoiya sã ã, yogon kayau bunem fateulen, are kayau momoiya sã ã, yogon momoiya tamo bunem fateulen. Age fiya sãf are, ã gereĩ tar idi karëtut to dibodõf. Anĩ ere, idi gama fateul dibodok.

<sup>15</sup> Anĩ ere, taka ã momoiya sã, iyawau fenẽ nigin oro foug are, utornẽge di, age foug. Suma age fiya bun, momoiya tamo be kayau, ereb taka anim to katĩ fiyek. Are Negur ã ada wau inosiya bun tabodõf nigin iweignadan.

<sup>16</sup> Kayau õ, nẽ tamo usennẽf be sã be anĩ, naig fe di, õ keleĩ youf? Tamo õ, nẽ kayau usennẽf be sã be anĩ, naig fe di, õ keleĩ youf?

<sup>17</sup> Odug ada mugu mugu igirnadan kilei ado, Negur ada mugu mugu iweignadan kilei bagai, age tag, mata tabodõgoug. Are, aya sios ganan bun nun enei anof.

<sup>18</sup> Sain Negur ã tamo taka iweignen, tamo ã mogo mulũ ilen de? Are tamo ã mulũ ileya sã to ilauf. Sain Negur ã tamo taka iweignen, tamo ã mulũ ileya sã de? Are tamo ã to mulũ ilauf.

<sup>19</sup> Mulũ ileya are ege, mulũ ileya sã areg ege. Anĩ ere, Negur nẽ ãtãfiya dõ fiya anĩ odug bagai.

<sup>20</sup> Tamo mugu mugu ã Negur iweignen sain bun, ã ibodon suma anĩ bun, agef ibodõf.

<sup>21</sup> Sain Negur ã iweignon, õ ferfer ubodon de? Õ anĩ nigin to morõ yõf, anĩ ere, õ ferfer itorõya nigin kisi falauf are, anĩ õ agoug.

<sup>22</sup> Ere nigin, taka ã, Odugem iweignen sain bun, ferfer ibodon, ã Odug nẽ karika tamo ibodok, age fiya gen, taka ã iweignen sain bun, karika tamo ibodon, ã Kristus nẽ ferfer ibodok.

23 Æ mala odugem na yaleyain. Æ tamo neid ferfer to wowã gouf.

24 Turau tar, tamo mugu mugu ï Negur iweignen sain bun ibodon suma anï bun, agef Negur ado dibodõf.

25 Kayau taulei nigin, aya Odug bun tamal itãfiya taka to alen. Anï ere, aya, taka ï Odug nẽ wau yũya bunem momoi bagai tamo wõ yen anï, aya neu kisi afeneik.

26 Gama enei nẽ morõ odug nigin, aya kisi afef, are tamo ï gama ibodok gen, agef ibodõf, are deuf.

27 Õ kayau ado de? Age fiyauf are, õ kayau iru iraileya nigin naab to umirẽf. Õ kayau to walende? Age fiyauf are, õ kayau taka yaleya nigin to umirẽf.

28 Anï ere, õ kayau walef are, õ mosor to unof. Kayau taulei taka tamo yalef are, ï mosor to inof. Anï ere, tamo kayau dalef, kayau tamo dalef, idi mata ibodõya enei bun morõ musei dalouf, are aya morõ enei ã bun to wõ youf anï orouf.

29 Turau tar, aya od enei arokeneik, are sain mogo tobegaf, anï nigin, gama sain enei ilef bun, idi kayau ado, idi kayau sã gen dibodõf;

30 idi maruid isif, idi to maruid isif gen dibodõf; idi waud al difef, idi waud to al difef gen dibodõf; idi erob taka na dalef, idi erob taka sã gen dibodõf;

31 idi teneub enei nẽ safina diroudif, are idi waud adok anï bun to dinouf. Ere nigin, teneub enei, gama agef ibodok anï, inanakalauf.

32 Aya ã to suwẽ gouf nigin orouf. Tamo kayau sã, ï Odug nẽ kabï nigin kisi fedig, are ï erob age

fe di, Odug al fouf nigin kisi fedig.

<sup>33</sup> Anĩ ere, tamo kayau ado, ĩ teneub enei nẽ bouwa isennẽya nigin kisi fedig, are ĩ ereb age fe di, yogon kayau al fouf nigin kisi fedig.

<sup>34</sup> Age fe di, yogon kisi fara fedig. Kayau tamo sã be, kayau taulei, ĩ Odug nẽ kabĩ nigin kisi fedig, are ĩ bouwa ado uur bun fateul wõ youf nigin age fedig. Anĩ ere, kayau tamo ado, ĩ teneub enei nẽ bouwa isennẽya nigin kisi fedig, are ĩ ereb age fe di, yogon tamo al fouf nigin kisi fedig.

<sup>35</sup> Aya od enei ãgenei biya fiya nigin orok, aya ã ifõyeĩf nigin to age afef, anĩ ere, ã madur agog fen, ã aug nigin Odug bun fara fiya sã wenẽgouf nigin age afef.

<sup>36</sup> Anĩ ere, tamo taka ĩ, kayau taulei yaleya nigin digirnen anĩ, ĩ bun tobonunã biya sã age afef ye fen, kayau ĩ tamo yaleya nẽ sain mogo wal fe di, tamo ĩ kayau yaleya nigin kisi fef are, tamo ĩ yogon oroya kilei age fouf. ĩ mosor to inof, are idi bagu difouf.

<sup>37</sup> Anĩ ere, tamo ĩ yogon wau bun total ifar fen, taka nẽ kisim to we fiyẽf, anĩ ere, yogon oroya dõf fen, kayau taulei anĩ to yalouf nigin yogon kisi ifõf are, areg ĩ tutuk age fouf.

<sup>38</sup> Anĩ nigin, tamo ĩ kayau taulei yalef are, ĩ tutuk age fef, anĩ ere, tamo ĩ kayau to yalef are, ĩ tutuk bagai age fef.

<sup>39</sup> Kayau ĩ yogon tamo fau mata ibodõf are, ĩ yogon tamo ado dibodõf. Anĩ ere, yogon tamo laa fouf are, ĩ yogon oroya dõf fen, taka bun ileya kisi feleya, anĩ ere, tamo ĩ Odug nigin momoi yef anĩ bun dogol.

<sup>40</sup> Anĩ ere, neu es fiya bun, kayau ĩ gama ibodok gen, ibodõf are, ĩ fatuk bagai al fouf. Aya kisi afef, are ayag Negur nẽ Awa Uur ado.

## 8

### *Saaf Idegẽya Waitou Bun Sesewi Difen*

<sup>1</sup> Gama, saaf idegẽya waitou bun sesewi difedig nigin, ada keleĩ, are ada ganan keleĩ ado. Keleĩ are yogo yana yaleseya inodig, anĩ ere, wau laa fiya anim biya yalesedig.

<sup>2</sup> Tamo ĩ ereb taka nigin aya keleĩ yef are, ĩ ereb taka keleĩ youf anĩ ĩ fau keleĩ sã.

<sup>3</sup> Anĩ ere, tamo ĩ Negur nigin wau laa fef are, Negur ĩ nigin keleĩ.

<sup>4</sup> Anĩ nigin, saaf idegẽya waitou bun sesewi difedig anĩ yõya nigin, ada keleĩ, are tenebur ein idegẽya waitou are ege, anĩ ere, Negur taka sã, tekelei dogol ibodok.

<sup>5</sup> Ere nigin, saa be teneub bun, idi waitou dedig anĩ dibodok, are momoi bagai waitou musei ado odug musei dibodok,

<sup>6</sup> anĩ ere, ada bun Negur tekelei dogol ibodok, are Dei, ĩ bun tamal ereb ereb ganan wõ yen, ĩ nigin ada mata tabodok. Odug tekelei dogol ibodok, are Jesus Kristus, ĩ bunem ereb ereb ganan wõ yen, ĩ bunem ada mata tabodok.

<sup>7</sup> Anĩ ere, tamo ganan enei keleĩ sã. Tamo kayau tunĩ fau idegẽya waitou nigin fatuk bagai kisi difedig nigin, sain idi saaf anĩ doko, idi saaf anĩ idegẽya waitou bun sesewi difen de fen, kisi difedig, age dife di, idi waud total sã nigin, amuyẽdig.

<sup>8</sup> Anĩ ere, saafem ada Negur non to irouladauf, are ada saaf to tãf are, anim ada to daũ fadauf, ada saaf tãfeg, anim ada to isennadauf.

<sup>9</sup> Anĩ ere, ereb ã karika ago gouf anim, idi momoiya total sã anidi bun, naabura gudũ fiya to wenēdigouf nigin lo walagauf.

<sup>10</sup> Ere nigin, taka ĩ wau total sã anĩ, õ keleĩ enei ado, idegēya waitou nē tempel bun saaf wõ mog ileyõf are, ĩ saaf idegēya waitou bun sesewi difen anĩ, kumĩ sã to yãf de?

<sup>11</sup> Anĩ nigin, turã total sã, ĩ nigin Kristus laa fen, are ogon keleim ĩ daũ fiyek.

<sup>12</sup> Sain ã naab enei bun tureĩ tar bun mosor unog fen, dogo neid waud total sã anĩ daũ wedigef are, ã Kristus bun mosor unogef.

<sup>13</sup> Anĩ nigin, ereb aya ãf anim neu turau mosor bun inenēf are, ayam ĩ mosor bun to anenēf nigin, aya muda baban to bagai ãf.

## 9

### *Aposel Ereb Yaleya Nigin Kisi Feleya*

<sup>1</sup> Ereb takam aya katĩ fiyaf de? Aya aposel sã de? Aya Jesus neda Odug to ailen de? ã Odug bun neu kabĩ bunem to wõ gen de?

<sup>2</sup> Tunĩ bun aya aposel sã be, anĩ ere, momoi bagai aya ã bun aposel. Ere nigin, ã Odug bun aya aposel kabĩ alef anĩ nē uris.

<sup>3</sup> Idi aya es difiyauf nigin dibodok anidi bun, isennaya od enei orok.

<sup>4</sup> Amã saaf ado naan yõya nigin to kisi feleya de?

<sup>5</sup> Amã, aposel tunĩ ganan, Odug nẽ tura tar ado Pita age difedig gen, kayau momoiya ado amã geid marou malauf, are to kisi feleya de?

<sup>6</sup> Takag, aya ado Banabas dogol mata ibodõya nigin kabĩ malouf de?

<sup>7</sup> Aim kusĩ tamo kabĩ yale fen, yogo nigin ereb ereb na yaledig? Aim wain kabier wain iten ken, dogo neid biya to yõdig? Aim sipsip lof fen, dogo neid su sumin to yõdig?

<sup>8</sup> Aya tamo nẽ lo fiya bunem dogol, od enei orok de? Lo anĩg enei nigin tekelei bagai to irok de?

<sup>9</sup> Ere nigin, Moses nẽ Lo bun eig ye itoton, “Õ bulmakau, wit faat biya nẽ gabar loko fediyouf nigin lalai feid mog, yogon awa to ufokalauf.”\* Negur ã bulmakau nigin kisi fef de?

<sup>10</sup> Momoi, Negur ã od enei ada nigin to irok de? Momoi, od enei ada nigin itoton, ere nigin, tamo teneub gudũ fedig ado, tamo wit faat biya nẽ gabar yaleledig, idi kusu fiya sain bun dogo neid morou morou dalouf nigin waud ise fen, age difedig.

<sup>11</sup> Amã ã atun āgenei uur nigin faat mararan ouf are, amã ã bun bouwa buru nẽ safina kusu mafouf are, anĩ odug biya de?

<sup>12</sup> Tunĩ ã bun isennẽya enei yaleya nigin kisi falauf are, amã idi wal fiya anĩ, to malouf de?

Anĩ ere, amã ã bun safina yaleya nigin kisi feleya enei to age mafen. Age fiya ban, amã Kristus nẽ biya od to naabura gudũ mafouf nigin, ereb ereb ganan faali mafef masin.

---

\* **9:9:** Diuteronomi 25:4

13 Idi tempel bun kabī daledig anidi, dogo neid saaf tempel bun daledig, idi alta bun aruna daledig anidi, ereb alta bun sesewi difen anī dale dogoledig, are ā to keleī de?

14 Naab tekelei anī bun, Odug iron, are idi biya od wogō def anidi, biya od bunem mata ibodōya nē safina dalouf.

15 Anī ere, aya safina yaleya nigin kisi feleya eneidi, anī taka to age afen. Age afe fen, aya, ā aya nigin ago gouf nigin, enei to atotof. Takam yanau yaleseyā enei aya bun yalelauf are, aya laa fiyauf anī orouf.

16 Aya biya od wogō auf sain bun, aya yug nigin yanau to alesedig, ere nigin, Negurem biya od wogō auf nigin nugo fiyadig. Aya biya od to wogō auf are, aya bun morō odug bagai wō youf.

17 Aya neu oroya bunem kabī enei alouf are, aya mala yaleya kisi feleya. Are neu oroyam sã, anī ere, aya Negurem kabī ifanan nigin age afef.

18 Age afouf are, ere anī neu mala solo? Are, sain aya biya od wogō auf, aya mala yaleya sã biya od wogō audig, are aya biya od bun mala yaleya nigin kisi feleya anī to age afedig.

19 Aya tamo taka nē sã, are aya karika, anī ere, aya tamo musei kisi feleya bagai gei afouf nigin, aya yug tamo ganā nē ferfer wō auf.

20 Juda idi bun, aya Juda idi gei afouf nigin, Juda tamo gen wō aun. Idi lo farumen dibodok anidi bun, aya yug lo farumen to abodok, anī ere, aya idi lo farumen dibodok anidi gei afouf nigin, aya tamo lo farumen ibodok gen wō aun.

21 Idi lo sã anidi bun, aya Negur nē lo bun karika sã, are aya Kristus nē lo farumen abodok,

anĩ ere, aya idi lo sã anidi gei afouf nigin, aya tamo lo sã gen wõ aun.

<sup>22</sup> Idi furũya anidi bun, aya idi furũya anidi gei afouf nigin, aya tamo furũya gen wõ aun. Aya ererb ererb ganan kisi feleya anĩ bunem, tunĩ kel gei afouf nigin, tamo ganan bun, idi dibodok gen tobonunã age fiya gen wõ aun.

<sup>23</sup> Aya biya od nigin enei ganan age afedig, are aya biya od nẽ el fiya weim talouf nigin.

<sup>24</sup> Gududuya bun, tamo ganan gududu dedig, anĩ ere, tekeleim dogol mala yaledig anĩ ã to keleĩ de? Naab age fiya bun, gududu ge fen, mala walogouf.

<sup>25</sup> Tamo ganan kodẽ wal difouf nigin age difedig anidi, ererb ererb ganan bun total bagai tai difedig. Idi mala fau sa kalauf anĩ dalouf nigin age difedig, anĩ ere, amã mala gai gai ibodkalauf anĩ yaleya nigin age mafedig.

<sup>26</sup> Anĩ nigin, aya tamo gariya sã gudu redig gen, to gudu raudig. Aya yau yũdig gen, to ege imau warũ yeledig.

<sup>27</sup> Anĩ ere, aya yug bouwau au ken, anĩ neu ferfer ibodõf nigin age afedig, are aya tunĩ wogõ afiyeĩd fen, aya yug mala solo yaleya nigin, kisi feleya sã to bagai wõ auf nigin age afedig.

## 10

### *Israel Neid Tubuid Tar Bun Weder Irouya Od*

<sup>1</sup> Turau tar, aya ã enei to keleĩ youf nigin to orouf, are Moses nẽ sain bun, tubuda tar ganan budũ farumen difar fen, idi ganan Maaĩ Giriya atu diyok dilen.

<sup>2</sup> Idi ganan budũ bun ado maaĩ bun naan dale fen, Moses nẽ ibor tar wowã den.

<sup>3</sup> Are, idi ganan uur nẽ saaf tekelei anĩ don,

<sup>4</sup> idi ganan uur nẽ naan tekelei anĩ don, are uur nẽ meein idi geid weim diyok dilen anĩ bun, idi naan don, meein are Kristus.

<sup>5</sup> Anĩ ere, Negur ĩ idi musei ganan nigin wau to al fen, anĩ nigin, dogo neid bouweid gerere tuan firagagaũ difen.

<sup>6</sup> Enei ganan ada wederada irouya nigin wõ yen, anĩ bunem ada idi age difen gen, ereb sane nigin wauda to tanouf.

<sup>7</sup> Idi neid tunĩ gen, ã idegẽya waitou yana to walesagauf. Are Negur nẽ Itotoya bun eig ye irok, “Tamo kayau saaf naan doko dibod ken, fafã de dale, noli tobonunã dinon.”\*

<sup>8</sup> Ada idi tunĩ age difen gen, noli tobonunã to tanouf. Age dife di, naa tekelei bun, idi atun tuwenti tri tausen tamo kayau gare den.

<sup>9</sup> Ada idi tunĩ age difen gen, Odug kisi fiya bun to tanenẽf. Idi age difen, gogourum didenkesin.

<sup>10</sup> Ada idi tunĩ gen, to nauseir tauf. Idi age difen, daũ fiya nẽ engelem idenkesin.

<sup>11</sup> Eneidi ada ifelnadauf nigin idi bun wõ yen, are idikeleya sain, ada bun mogo wõ yen anĩ bun, wederada irouya nigin itoton.

<sup>12</sup> Anĩ nigin, taka ĩ kisi fef, total ifaref yef, ĩ to kubũ youf nigin lo falauf.

<sup>13</sup> Kisi fiya ganan ã bun wõ yedig, are tamo bun wõ yedig dogol. Anĩ ere, Negur ĩ age afouf yef anĩ, age fedig, ĩ kisi fiya ã yaleya kisi feleya sã anĩ, ã

---

\* **10:7:** Eksodas 32:6

bun to wõ youf nigin age fouf. Anĩ ere, ã kisi yeĩf sain bun, Negur ĩ iyawoya nẽ naab anĩg ifelneĩf, anĩ bunem ã total ufaragauf nigin sã kisi falauf.

*Saaf Idegëya Waitou Bun Dinon Ado Odug Nẽ Saaf*

<sup>14</sup> Anĩ nigin, neu turau tar oboiyou, idegëya waitou yana yaleseya bun tamal uyalalagauf.

<sup>15</sup> Aya ã tamo kayau kisi biya ado gen aro-keneik, ereb aya arok anĩ, ã aug es gouf.

<sup>16</sup> De fiyëya nẽ kap, ada de fiya tafenedig, are Kristus nẽ naud bun bagu fiya sã de? Bret ada mumã tafedig, are Kristus nẽ bouwa bun bagu fiya sã de?

<sup>17</sup> Bret tekelei dogol ibodok nigin, ada musei, anĩ ere, bouwada tekelei, ere nigin, ada ganan bret tekelei anĩ bun bagu tafedig.

<sup>18</sup> Israel tamo kayau nigin kisi walogouf, idi sesewi fiya nẽ saaf dōdig anidi, alta bun to bagu difedig de?

<sup>19</sup> Age fouf are, ere anĩ kisi afef, are sesewi fiya nẽ saaf idegëya waitou difenek anĩ odug de, oo idegëya waitou anĩ odug de?

<sup>20</sup> Sã, anĩ ere, haiden neid sesewi fiya anĩ kaa sesen bun difenedidig, are Negur bun sã. Are aya ã kaa sesen geid bagu gouf nigin to orouf.

<sup>21</sup> ã Odug nẽ kap bun ado kaa sesen neid kap buneg yōya nigin kisi feleya sã. ã Odug nẽ tebol bun ado kaa sesen neid tebol buneg bagu fiya nigin kisi feleya sã.

<sup>22</sup> Ada Odug kiyeyĩ ifanadauf nigin age tafef de? Ada neda megeir ĩ wal fiya de?

*Momoiya Tamo Kayau Neid Tobonunã*

<sup>23</sup> Tunĩ dirõdig, “Ada erëb erëb ganã nigin, sã age tafeid, age fiya nigin kisi feleya,” anĩ ere, erëb erëb ganã to isennadauf. Tunĩ dirõdig, “Ada erëb erëb ganã nigin, sã age tafeid, age fiya nigin kisi feleya,” anĩ ere, erëb erëb ganã biya fiya to inouf.

<sup>24</sup> Taka ã yogon biya fiya nigin to imirëf, anĩ ere, tunĩ neid biya fiya nigin imirëf.

<sup>25</sup> Erëb erëb yaro maket bun na sur difedig anĩ, ãgenei kisi bun to fiya sã wãgauf,

<sup>26</sup> ere nigin, “Teneub ado erëb erëb ganã anĩ namen yenek are Odug nẽ.”†

<sup>27</sup> Momoiya sã tamo taka, saaf yõya nigin ã iweigneĩ di, ã ileya nigin oroyeĩf are, erëb erëb ã meleĩ bun inodin anĩ, ãgenei kisi bun to fiya sã wãgauf.

<sup>28</sup> Anĩ ere, taka ã ã irokeneĩf, “Enei are sesewi fiya bun difenen,” youf are, tamo irokenein ã nigin ado kisi es fiya yaor karëtut ibodõf nigin, saaf anĩ to wãgauf.

<sup>29</sup> Neu wogõya nẽ gariya are, tamo anĩ nẽ kisi es fiya nigin, are ãgenei kisi es fiya nigin sã. Taka nem irõf, “Age fiyauf are, ere nigin neu erëb erëb nigin kisi feleya anĩ, tamo taka nẽ kisim es fouf?”

<sup>30</sup> Aya de fiya bunem saaf ãf are, ere nigin taka nem saaf anĩ nigin, Negur de afiyek nigin bou yũya od irok?”

<sup>31</sup> Anĩ ere, ã saaf wãgauf, naan wãgauf ado, erëb erëb ganã ago gouf are, Negur nẽ fula fiya medeĩya nigin anĩ ganã ago gouf.

---

† **10:26:** Sam 24:1

<sup>32</sup> Juda tamo, Grik tamo be, Negur nē sios bun tamo taka, to ye tū foug nigin ago gouf.

<sup>33</sup> Ayag naab ganan bun tamo ganan al afiyēdiyof nigin age afedig gen, ago gouf. Ere nigin, aya neu biya fiya to amirek, anī ere, musei isennēdiyof nigin, dogo neid biya fiya amirek.

## 11

<sup>1</sup> Ayag Kristus madē afiyēdig gen, ā aya madē wiyagauf.

### *Negur Yana Yaleseya Bun Mudur Kerū Fiya*

<sup>2</sup> Aya ā yeneī alesef, ere nigin, ā erab erab ganan bun aya nigin karī weleg fen, ifelnēya anī aya ale fen, ā afenein anī, kafī weleg uroug usigef.

<sup>3</sup> Anī ere, aya ā eig fiya anī keleī youf nigin orouf, are tamo ganan neid mudur are Kristus, kayau nē mudur are tamo, Kristus nē mudur are Negur.

<sup>4</sup> Tamo ganan, taka ī yogon mudur kerū fel fen, kosē yef be, profet od wogō yef, ī yogon mudur Kristus mama ifenek.

<sup>5</sup> Kayau ganan, taka ī yogon mudur to kerū fel fen, kosē yef be, profet od wogō yef, ī yogon mudur, are aiwa anī mama ifenek, are ī yogon fatiya korerē feleya gen.

<sup>6</sup> Kayau taka ī yogon mudur kerū fiya sāf are, ī yogon fatiya gudū falauf. Kayau taka ī yogon fatiya gudū foug be, korerē foug anim, mama ifenēf are, ī yogon mudur kerū foug.

<sup>7</sup> Tamo taka ī yogon mudur to kerū foug, ere nigin, ī Negur nē malakanon ado fula fiya medeīya,

tamo bun. Anĩ ere, kayau ã tamo nẽ fula fiya medeĩya, kayau bun.

<sup>8</sup> Ere nigin, tamo ã kayau bunem to isin, anĩ ere, kayau ã tamo bunem isin.

<sup>9</sup> Takag, tamo ã kayau isennẽf nigin to inon, anĩ ere, kayau ã tamo isennẽf nigin inon.

<sup>10</sup> Age fiya nigin, kayau ã, engel idi neid meleid bun, ã tamo farumen ibodok anĩ ifelnẽdiyof nigin, yogon mudur kerũ fof.

<sup>11</sup> Anĩ ere, Odug bun kayau ã tamo bun yogo mugu to ifaref, tamo ãg kayau bun yogo mugu to ifaref.

<sup>12</sup> Ere nigin, kayau ã tamo bunem isin gen, tamo ãg kayau bunem wõ yen. Anĩ ere, ereb ereb ganan Negur bun tamal isif.

<sup>13</sup> ã aug es gouf, are kayau taka ã yogon mudur to kerũ fel fen, Negur kosẽ fiyek, are de de?

<sup>14</sup> Tamo taka fatiya salo isiya adouf anim mama ifenek anĩ, tamo nẽ tobonunã anĩ to ifelneik de?

<sup>15</sup> Anĩ ere, kayau taka ã fatiya salo isiya adouf, are yogon fula fiya medeĩya. Ere nigin, fatiya salo isiya are, yogon mudur kerũ fiya nigin ifenen.

<sup>16</sup> Anĩ ere, taka ã od enei kiwai ifenẽf are, ada suma taka sã, Negur nẽ sios buneg suma taka sã.

### *Odug Nẽ Saaf*

*(Matyu 26:26-29; Mak 14:22-25; Luk 22:14-20)*

<sup>17</sup> Faded fiya dõ fiya enei bun, aya ã yeneĩ to alesef, ere nigin, ãgenei guru fiya biya anĩ fotokar sane isidig.

<sup>18</sup> Uruwa bun, aya karĩ aun, are ã sios nigin guru gef ã atun, fara fiya yenẽdig, age afe fen, od tunĩ aya momoi auf.

19 Æ atun fara fiya bagai yenek, anī bunem, ã atun ai anī Negur yo fiyen anī ifelneif.

20 Anī nigin, sain ã guru gef, are Odug nē Saaf bagai anī to wōgedig,

21 ere nigin, sain ã saaf wōgef bun, ã abob tari fediya sã, mugu mugu saaf wōgedig, anī nigin, taka ī naū ibodōdig, taka ī naan yōdig.

22 Saaf ado naan yōya nigin ã fō sã de? Æ Negur nē sios lai ge fen, idi safina sã anidi mama wenēdigef de? Aya ã ere ayeif? Aya enei nigin ã yeneī alesauf de? Sã bagai! Aya enei nigin ã yeneī to alesauf.

23 Ere nigin, aya enei Odug bun tamal ale fen, ãg afenein. Are Odug Jesus, Judas ī kiwai ifenen bō anī bun, bret yale,

24 Negur de fiye ken, bret anī mumãf fen, iron, “Enei neu bouwau, are ã nigin. Aya nigin karī walagauf nigin enei ago gouf.”

25 Naab tekelei bun, bō saaf bure difel fen, ī kap yale fen, iron, “Kap wain enei neu naudou bun bar itenēya mata. Sain ganan ã wāgauf, aya nigin karī walagauf nigin enei ago gouf.”

26 Ere nigin, sain ganan ã bret enei wōg fen, kap enei bun wāgauf, ã Odug nē laa nigin kurō wesig mog, ī fau isiyouf.

27 Anī nigin, taka ī tutuk sã bret anī yãf be, Odug nē kap bun yãf are, ī Odug nē bouwa ado naud bun mosor inouf.

28 Taka ī yogo nigin es fel fen, bret anī yoko, kap anī bun yãf.

29 Ere nigin, taka ī Odug nē bouwa nigin to kisif fen, bret yoko, kap bun yãf are, ī yogon es fiya anī

yogo yoko.

<sup>30</sup> Anĩ nigin, ã atun musei malegeid fen, dagi didig, ãgenei tunĩ gare den.

<sup>31</sup> Anĩ ere, ada nigin es tafouf are, ada es fiya bun to tabodõf.

<sup>32</sup> Sain ada Odugem es fadauf, are ada Odugem madur fadauf, are ã teneub enei nẽ tamo kayau geid ada mosor ado to youf nigin age fouf.

<sup>33</sup> Anĩ nigin, neu turau tar, sain ã yõya nigin guru gouf are, ã abob nigin tari gouf.

<sup>34</sup> Taka ã naũ fouf are, ã fõ bun yãf, anĩ bunem, sain ã guru gouf, ã es fiya bun to ulagauf.

Sain aya asiyouf, aya faded fiya tobol afeneĩf.

## 12

### *Awa Uur Fateul Nẽ Ege Luwa*

<sup>1</sup> Turau tar, aya ã Awa Uur Fateul nẽ ege luwa nigin to keleĩ youf anĩ to orouf.

<sup>2</sup> ã keleĩ, sain ã haiden ubodõgen, naab fire fire bun ditonei ken, eweid ifofakeleya idegẽya waitou bun, fõ yeleya nigin dirou dileyein.

<sup>3</sup> Anĩ nigin, aya ã arokeneik, are taka ã Negur nẽ Awa Uur bunem wogõ yef, ã to irõdig, “Jesus sane lauf.” Takag, taka nem eig ye irõya kisi feleya sã, “Jesus ã Odug,” are Awa Uur Fateulem dogol.

<sup>4</sup> Ege luwa nigin fire fire dibodok, anĩ ere, Awa Uur anĩ tekelei.

<sup>5</sup> Kabĩ gariya fire fire dibodok, anĩ ere, Odug tekelei.

<sup>6</sup> Kabĩ nẽ megeir fire fire dibodok, anĩ ere, Negur tekelei ã, tamo ganan bun, kabĩ nẽ megeir ganan nigin kabĩ yaledig.

<sup>7</sup> Tamo ganan isennēdiyof nigin, tamo mugu mugu bun Awa Uur yaor fedig.

<sup>8</sup> Taka bun Awa Uur bunem kisi biya nē od ifenek, taka bun Awa Uur tekelei bunem keleī nē od ifenek,

<sup>9</sup> taka bun Awa Uur tekelei bunem momoiya anī ifenek, taka bun Awa Uur tekelei anī bunem dagi el fiya nē ege luwa ifenek,

<sup>10</sup> taka bun memelik inoya nē megeir ifenek, taka bun profet od ifenek, taka bun uur es fiya ifenek, taka bun od fire fire nem wogōya ifenek, taka bun od fire fire nem wogōya anī falei fiya ifenek.

<sup>11</sup> Enei ganan Awa Uur tekelei dogol ī yogon kabī, ī yogon oroya dōf fen, tamo kayau mugu mugu anī ifenēdidig.

### *Bouwa Tekelei, Fara Fiya Musei*

<sup>12</sup> Bouwa anī tekelei, anī ere, bouwa anī fara fiya musei bunem inof. Yogon fara fiya ganan are musei, anī ere, idi bouwa tekelei dinof. Kristus īg age fiya.

<sup>13</sup> Ere nigin, ada ganan, Juda tamo be Grik tamo, ferfer be kafī fiya sā tamo, Awa Uur tekelei bunem naan tale fen, bouwada tekelei wō taun, agef fen, ada ganan Awa Uur tekelei naan gen tokon, megeir talouf nigin ifanadan.

<sup>14</sup> Bouwa ī fara fiya tekeleim to inof, anī ere, fara fiya museim inof.

<sup>15</sup> Ye ī, aya ima sā, anī nigin, aya bouwa nē tunī sā youf, anī ere, gariya anī bun ī aya bouwa nē tunī sā yeya kisi feleya sā.

16 Takag, weder ï, aya mala sã, anĩ nigin, aya bouwa nẽ tunĩ sã youf, anĩ ere, gariya anĩ bun ï aya bouwa nẽ tunĩ sã yeya kisi feleya sã.

17 Bouwa adok malauf are, nainenem karĩ wouf? Bouwa adok wederouf are, nainenem sumeĩ walouf?

18 Anĩ ere, momoi, Negur ï bouwa nẽ fara fiya, ï orof kilei bagai, mugu mugu ganan inenẽdin.

19 Bouwa nẽ fara fiya anĩ ganan tekelei youf are, bouwa ï nain ibodõf?

20 Age fiya gen, bouwa nẽ fara fiya musei dibodok, anĩ ere, bouwa de tekelei.

21 Mala ima to irokenẽf, “Aya õ to orouf!” Are, mudur ye to irokenẽf, “Aya õ to orouf!”

22 Age fiya ban, bouwa nẽ fara fiya tunĩ total sã tailedig anĩ sãf are, bouwa ibodõya kisi feleya sã.

23 Ada bouwa nẽ fara fiya yana sã gen tauf anĩ, ada yana talesedig. Ada bouwa nẽ fara fiya yaor fiya kisi feleya sã anĩ, dede ta, ed tafedig,

24 anĩ ere, bouwada nẽ fara fiya yaor fiya kisi feleya anĩ, ada to dede ta, ed tafedig. Anĩ ere, Negur ï bouwa nẽ fara fiya bagu feleid fen, fara fiya yana sã idi yana odug ifenẽdin,

25 anĩ bunem, bouwa bun foi fiya to ibodõf, anĩ ere, bouwa nẽ fara fiya idi abob nigin kilei kilei kisi difouf.

26 Bouwa nẽ fara fiya takam darau yalouf are, bouwa nẽ fara fiya ganan ï geid darau daledig. Bouwa nẽ fara fiya takam yana yalouf are, bouwa nẽ fara fiya ganan ï geid kulĩ dedig.

27 Gama, ã Kristus nẽ bouwa, are ã mugu mugu anĩ nẽ fara fiya.

28 Sios bun Negur ĩ uyulil aposel ganan igirnēdin, anĩ dō fiya profet, anĩ dō fiya tise, age fe di, memelik inoya tamo ado, dagi el fiya nē megeir dalen anidi, tunĩ isennēdiya nigin kisi feleya anidi, ereb ereb lo fiya nigin megeir dalen anidi, od fire fire nem wogōya nigin kisi feleya anidig igirnēdin.

29 Idi ganan aposel de? Idi ganan profet de? Idi ganan tise de? Idi ganan memelik dinof de?

30 Idi ganan dagi el fiya nē megeir dalef de? Idi ganan od fire fire nem wogō def de? Idi ganan od fire fire nem wogōya anĩ falei difef de?

31 Anĩ ere, Awa Uur nē ege luwa odug yaleya nigin kisi total walogouf.

Gama aya naab gai biya bagai taka afelneĩf.

## 13

### *Wau Laa Fiya*

1 Aya tamo nē od fire fire nem ado engel nē od nem wogō aufeg, wau laa fiya sãf are, aya belo gaōya be, kadod ait gūya gen dogol.

2 Aya profet od wogōya nigin Awa Uur nē ege luwa ado fen, Negur nē waa ganan ado kelei ganan kelei ken, arei godo fiya nigin momoiya odug ado, anĩ ere, wau laa fiya sãf are, aya tamo ege.

3 Aya ereb aya ado ganan maleg afeneĩd fen, bouwau atorō di, yā malan dirãf, anĩ ere, aya wau laa fiya sãf are, aya mala biya taka to alouf.

4 Wau laa fiya are molol, wau laa fiya are dor yaleya. ĩ to kiyeĩ inodig. ĩ yogo yana to yalesedig. ĩ yogo to seli yabidig.

<sup>5</sup> Ī tobonunã sane sã, ĩ yogo nigin aya dogol to yedig, ĩ kaisã to seye yedig, ĩ sane difiyek anĩ to karĩ yeledig.

<sup>6</sup> Wau laa fiya anĩ sane nigin to kulĩ yedig, anĩ ere, momoi nigin kulĩ yedig.

<sup>7</sup> Ī faimud kulatun fedig, ĩ faimud momoi yedig, ĩ faimud wau isedig, ĩ faimud feseya sã megeir ifaredig.

<sup>8</sup> Wau laa fiya are to bagai sa kalauf. Anĩ ere, profet od wogõya are sa kalauf, od fire fire nem wogõya are sa kalauf, keleĩ are sa kalauf.

<sup>9</sup> Ere nigin, ada keleĩ tunĩ dogol kelei ken, profet od tunĩ dogol wogõ taudig,

<sup>10</sup> anĩ ere, sain kibo feleya bagai anĩ isiyouf, kibo feleya bagai sã anĩ sa kalauf.

<sup>11</sup> Aya simõ bun, aya simõ gen wogõ aun, aya simõ gen kisi afen, aya simõ gen karĩ aun. Sain aya biyau fen, aya simõ nẽ tobonunã dumeun arailen.

<sup>12</sup> Gama ada dodo bun gen malakanon yaor sã tailedig, sain ada tarabã fadauf bun tutuk bagai tailauf. Gama aya tunĩ dogol keleĩ, sain anĩ bun Negur aya nigin ganan keleĩ gen, aya ganan keleĩ youf.

<sup>13</sup> Are gama towo eneidi difaref, momoiya, wau iseya ado, wau laa fiya. Anĩ ere, anĩ atun wau laa fiya anĩ odug bagai, ganan wal fiya.

## 14

*Profet Od Wogõya Ado Od Fire Fire Nem  
Wogõya Nigin Awa Uur Nẽ Ege Luwa*

<sup>1</sup> Wau laa fiya nē naab dōg fen, Awa Uur nē ege luwa yaleya nigin kisi total walogouf, Awa Uur nē ege luwa bun profet od wogōya nē anī bagai walogouf.

<sup>2</sup> Ere nigin, taka ī od fire nem wogō yef, ī tamo to wogō fiyēdif, anī ere, ī Negur wogō fiyek. Are, taka nem in od to keleī youf. Ī Awa Uur bunem Negur nē waa wogō yef.

<sup>3</sup> Anī ere, taka ī profet od wogō yef, ī tamo megeir ifenēdiyof nigin, waud yalesauf nigin ado, waud yo fouf nigin wogō fiyēdif.

<sup>4</sup> Taka ī od fire nem wogō yef, ī yogo dogol isennek, anī ere, taka ī profet od wogō yef, ī sios isennek.

<sup>5</sup> Aya ā ganan od fire fire nem wogō gouf nigin orouf, anī ere, aya ā profet od wogō gouf nigin orouf bagai. Taka ī od fire nem wogō yef, ī sios isennēf nigin taka nem yogon od to falei fouf are, taka ī profet od wogō yef anim, taka ī od fire nem wogō yef anī wal fiya.

<sup>6</sup> Turau tar, aya ā gein asi fen, od fire nem wogō auf sain bun, aya kurō fesiya od tunī, keleī, profet od be, faded fiya nē od, ā bun to arou asiyof are, ere biya aya ā afeneīf?

<sup>7</sup> Ereb idi mata sā aitedif, digē be gita age fiya, idi ailō fire fire to dinouf are, naig fe di, taka nem ere seg kodē def anī keleī youf?

<sup>8</sup> Takag, taur ait tutuk to wō youf are, aim kušī nigin dodok fouf?

<sup>9</sup> Āg age fiya. Ā, āgenei baleim od fire nem yaor to wogō gouf are, taka ī naig fe fen, ā wogō gef anī keleī youf? Ā ege od yau bun urarāgouf dogol.

10 Tenebur ein od fire fire musei dibodok, anĩ ere, idi gariya sã taka to ibodok.

11 Aya ereb taka nem wogõ yef, anĩ nẽ gariya to keleĩ youf are, aya wogõ yef anĩ nẽ yaũ tamo, age fe di, ã aya bun yaũ tamo.

12 ãg age fiya. ã Awa Uur nẽ ege luwa yaleya nigin kabĩ totol walegedig, anĩ nigin, sios isennẽya nẽ ege luwa yaleya nigin kabĩ totol walogouf.

13 Age fiya nigin, taka ã od fire nem wogõ yef, ã ereb wogõ yef anĩ falei fouf nigin kosẽ youf.

14 Ere nigin, aya od fire nem kosẽ auf are, neu uur kosẽ yef, anĩ ere, neu kisi faat yũya sã.

15 Anĩ nigin, aya naig afouf? Aya neu uur bun kosẽ auf, anĩ ere, aya neu kisi buneg kosẽ auf. Aya neu uur bun seg alouf, anĩ ere, aya neu kisi buneg seg alouf.

16 Õ ogon uur bun Negur yana walesauf are, taka ã idi anĩ to keleĩ anidi atun ibodok, ã ereb õ urok anĩ keleĩ sã nigin, naig fe fen, ã ogon de fiyẽya bun “Momoi” youf?

17 Õ ogon de fiya are biya bagai, anĩ ere, taka to usennek.

18 Aya ã ganan wal yeĩya, od fire nem wogõ auf nigin Negur de afiyek.

19 Anĩ ere, sios bun, aya ten tausen od od fire nem wogõya anĩ fotokar, tunĩ tai fediya nigin od faif bun yaor wogõ auf anĩ orouf.

20 Turau tar, ãgenei kisi bun simõ gen to ufareg. Sane nigin, momou nẽ kisi gen ufareg, anĩ ere, ãgenei kisi bun biyeĩ ufareg.

21 Lo bun eig ye itoton:

Odug irok,

“Tamo od fire nem wogõ def anidi bunem ado,  
 yaũ tamo sigoreid bunem,  
 aya tamo kayau eneidi wogõ afediyouf,  
 anĩ ere, sain anĩ buneg idi aya to karĩ di-  
 fiyauf.”\*

<sup>22</sup> Anĩ nigin, od fire nem wogõya are, momoiya tamo kayau bun uris sã, anĩ ere, momoiya sã tamo kayau bun uris. Anĩ ere, profet od wogõya are, momoiya tamo kayau bun, momoiya sã tamo kayau bun sã.

<sup>23</sup> Anĩ nigin, sios guru fiya odug bun, tamo kayau ganan od fire nem wogõ de di, tunĩ anĩ keleĩ sã be, tunĩ momoiya sã disiyouf are, idi ã nigin wadã ideneik to douf de?

<sup>24</sup> Anĩ ere, taka ã momoiya sã be, taka ã anĩ keleĩ sã, tamo kayau ganan profet od wogõ de mog, isiyouf are, ã tamo kayau ganan neid wogõya bunem ã mosor tamo ya anĩ kisi fokõ ye di, tamo kayau ganan ã es difiyēf,

<sup>25</sup> age dife di, yagon wau bun iminēdig anĩ yaorouf. Anĩ nigin, ã kusureis fen, Negur yana yales, “Momoi bagai, Negur ã atun ibodok,” youf.

### *Negur Yana Suma Dõf Yaleseya*

<sup>26</sup> Anĩ nigin, turau tar, ada naig tafouf? Sain ã guru gef, ã ganan atun taka seg ado, taka faded fiya nē od ado, taka kurõ fesiya od ado, taka od fire nem wogõya be, od fire nem wogõya anĩ falei fiya adof. Anĩ ganan sios megeir fiya nigin ago gouf.

<sup>27</sup> Taka ã od fire nem wogõ youf are, uru be, towom dogol age fiya sain dale fen, teke tekeleim

---

\* **14:21:** Asaia 28:11, 12

wogõ douf. Age fe di, taka nem od fire nem wogõya anĩ falei fouf.

<sup>28</sup> Od fire nem wogõya anĩ falei fiya tamo sãf are, wogõya tamo ĩ sios bun foro yel fen, yogo ado Negur bun wogõ youf.

<sup>29</sup> Profet uru be, towom age fiya wogõ douf, age de mog, tunĩ ganan, ereb wogõ yef anĩ el de es difouf.

<sup>30</sup> Anĩ ere, idi guru fiya dibodok anidi atun, kurõ fesiya od taka, taka bun isiyouf are, uyu wogõ yef are dẽ yalauf.

<sup>31</sup> Ere nigin, ã ganan sain waleg fen, teke tekeleim profet od wogõ gouf, anĩ bunem, ganan keleĩ dale fen, waud yalesauf.

<sup>32</sup> Profet neid uur are profet dogo kulatun dife fen, dogo neid wogõya sain bun dogol wogõ douf.

<sup>33</sup> Ere nigin, Negur ĩ ekul fiya nẽ Negur sã, ĩ wau inosiya nẽ Negur.

Tamo kayau fateul neid sios ganan bun age difedig gen,

<sup>34</sup> kayau idi sios bun foro del difarauf. Idi wogõya nẽ modoũ to difenẽdiyof, anĩ ere, idi Lo irok kilei, anĩ dõ difouf.

<sup>35</sup> Idi ereb taka nigin to fiya orodiyof are, idi neid fõ bun dogo neid tamo to difediyof, ere nigin, kayau taka sios bun wogõya are mama ado.

<sup>36</sup> Negur nẽ od ã bunem gariya inon de? Od anĩ ã bun dogol isin de?

<sup>37</sup> Taka ĩ kisif, ĩ profet taka be, ĩ Awa Uur nẽ ege luwa alen youf are, ĩ ereb aya atotkeneik are Odug nẽ ĩtãfiya ya anĩ keleĩ youf.

<sup>38</sup> Taka ï enei welebi foug are, ï yogo welebi fiyēf.

<sup>39</sup> Anï nigin, turau tar, profet od wogō goug nigin kisi total walogoug. Agog fen, od fire nem wogōya nigin to katū wiyēdigoug.

<sup>40</sup> Anï ere, ereb ereb ganan suma bagai dōg fen, biya bagai ago goug.

## 15

### *Kristus Nē Mata Kel Fāya*

<sup>1</sup> Turau tar, aya biya od wogō ayeï di, waleg fen, anï teten ufaregef anï, baban ā kisi turï ayeïf nigin oroug.

<sup>2</sup> Ā od aya wogō ayein anï, uroug kafï waleg fen, ege to momoi gen ouf are, biya od enei bunem ā kel gei yeïf.

<sup>3</sup> Ere nigin, ereb aya alen, are odug bagai nigin, uyulil anï aya ā afenein, are Kristus ï, Negur nē Itotoya bun yenek kilei, neda mosor nigin laa fe di,

<sup>4</sup> ï mū difen, are Negur nē Itotoya bun yenek kilei, naa towo bun ï mata kel fā yen,

<sup>5</sup> are ï Pita bun wō ye fen, anï dumen in dō fiya tar tuwelf bun wō yen.

<sup>6</sup> Anï bure fele di, ï sain tekelei bun tura tar faif hundred wal fiya meleid bun wō yen, anidi ganan musei fau dibodok, tunï gare den.

<sup>7</sup> Agef fen, ï Jems mala bun wō yen, anï dumen aposel ganan meleid bun wō yen.

<sup>8</sup> Anï ganan bure fel fen, idikeleya bun, ï, aya kesu gō fiya sain sā bun gō difiyan gen anï, malau buneg wō yen.

<sup>9</sup> Ere nigin, aya aposel idi atun naal bagai, aya to biya nigin aposel yeya nigineg kisi feleya sã, ere nigin, aya Negur nẽ sios darau afenen.

<sup>10</sup> Anĩ ere, Negur nẽ wau ifenẽya bunem, aya gama afaref gen age wõ aun. Aya bun yogon wau ifenẽya anĩ ege to ilen. Sã, aya kabĩ totol idi ganan wal fediya alen, are ayam sã, anĩ ere, Negur aya ado ibodon in wau ifenẽya anim.

<sup>11</sup> Age fiya nigin, ayam be, idim, amã enei wogõ mauf, are ã enei momoi gen.

### *Gare Den Tamo Neid Mata Kel Fãya*

<sup>12</sup> Amã Kristus gare den anidi bun tamal mata kel fã yen anĩ wogõ maudig, anĩ ere, naig fe di, ã tunĩ, gare den anidi mata to ke de fã douf gedig?

<sup>13</sup> Gare den anidi, mata to ke de fã douf are, Kristus ïg mata to kel fã yem.

<sup>14</sup> Kristus ï mata to kel fã yem are, nemã wogõya anĩ kaũ sã di, ãgenei momoiya areg kaũ sam.

<sup>15</sup> Age fiyam are, amã Negur nigin idegẽya od wogõ maudig anĩ dilemam, ere nigin, amã Negur ï Kristus gare den anidi bun tamal turĩ fiyen anĩ kurõ mafesidig. Anĩ ere, Negur ï gare den anidi to turĩ fediyouf anĩ momoi ouf are, ï Kristus to turĩ fiyem.

<sup>16</sup> Ere nigin, Negur ï gare den anidi to turĩ fediyouf are, ï Kristuseg to turĩ fiyem.

<sup>17</sup> Negur ï Kristus to turĩ fiyem are, ãgenei momoiya are ege, ã ãgenei mosor bun fau ubodõgef.

<sup>18</sup> Age fiyam are, idi Kristus nigin momoi de fen, gare den anidig fõ delem.

19 Ada ein mata ibodōya enei nigin dogol, Kristus bun wauda iseya adouf are, ada tamo ganan wal fediya maladalon ado.

20 Anī ere, Kristus momoi bagai gare den anidi bun tamal kel turī fiyen, are idi gare den anidi bun tamal faat uyulil yun gen.

21 Are, laa are tamo tekelei bunem isin nigin, gare den neid kel fāya areg tamo tekelei bunem isif.

22 Are, Adam bun ganan gare dedig, age fiya gen, Kristus bun ganan mata ifenēdiyof.

23 Anī ere, idi mugu mugu dogo neid sain bun age difouf: Kristus ī uyulil faat yūya, anī dumen, ī isiyof sain bun, idi yogon dibodok anidi, mata ke de fā douf.

24 Anī bure fele di, idikeleya sain isiyof, sain anī bun, Kristus ī gawaman ganan, yeneid ado ganan, megeir ganan daū fel fen, tano anī yale, Dei Negur ima bun inouf.

25 Ere nigin, ī king ibodok ile, yogon kiwai tar ganan yogo ye farumen inenēdiyof sain anī bun.

26 Kiwai idikeleya bun daū fiya nē, are laa.

27 Are Negur nē Itotoya bun eig ye irok kilei, “Negur ī ereb ereb ganan yogo ye farumen inenēdin.”\* Sain ī irok, are ereb ereb ganan ī farumen inenēdin, are Negur ī ereb ereb ganan Kristus farumen inenēdin, Negur ī yogo enei farumen to ibodok ya anī yaor.

28 Sain Negur ī enei age fel fen, Naal yogo, Negur ī ereb ereb ganan Kristus farumen inenēdin anī, farumen inenēf, anī bunem, Negur ī ereb

---

\* 15:27: Sam 8:6

ereb ganan nē mudur ibodōf.

<sup>29</sup> Mata kel fāya anī sāf are, idi tamo gare den anidi nigin naan dalef idi naig difouf? Tamo gare den anidi to bagai kel turī fediyouf are, ere nigin tamo kayau idi nigin naan daledig?

<sup>30</sup> Takag, amā nigin, ere nigin amā mug sain ganan bouwamā waila bun manenēdig?

<sup>31</sup> Turau tar, aya ā neda Odug Kristus Jesus bun ubodōgef nigin, yanau alesedig anī bunem, momoi bagai enei total bagai arok, are aya naa ganan laa bun eledig.

<sup>32</sup> Aya tamo nē kisi bunem dogol, Efesus oun gaar kuī geid kusī aun ouf are, ere mala biya anī aya alen? Tamo gare den anidi to kel turī fediyouf are, Negur nē Itotoya bun yenek kilei, “Saaf ado naan tāf, ere nigin, nil gare tauf.”†

<sup>33</sup> Ā taka nem to idegneif. “Sane geid nigal yūya bun, tobonunā biya daū fedig.”

<sup>34</sup> Kisi biya bun kel usig ufareg fen, mosor inoya utorōg, ere nigin, ā atun tunī Negur nigin keleī sā difaref. Aya ā mama yeif nigin enei wogō auf.

### *Kel Fāya Nē Bouwa*

<sup>35</sup> Anī ere, taka nem to fouf, “Tamo gare den anidi, naig fe kel turī fediyouf? Bouweid naig fiya bagai ado disiyouf?”

<sup>36</sup> Ā neneya bagai! Ereb ō tu wouf anī, to laa fouf are, anī mata to wō youf.

<sup>37</sup> Sain ō tu wof, ō fau ibodōf nē bouwa anī to utenek, anī ere, wit be, ereb taka nē faat dogol.

---

† 15:32: Asaia 22:13

<sup>38</sup> Anĩ ere, Negur ĩ oron kilei, bouwa ifenēdig, agef fen, ĩ faat fire fire dogo neid bouweid fire fire ifenēdidig.

<sup>39</sup> Bouwa ganan tekelei sã. Tamo nē bouwa are fire, gaar bouwa fire, ninã bouwa fire, gau bouwa fire.

<sup>40</sup> Saa ilun nē bouweid ado di, tenebur nē bouweideg ado. Anĩ ere, saa ilun nē bouweid fula fiya medeĩya fire di, tenebur nē bouweid fula fiya medeĩya areg fire.

<sup>41</sup> Gaa are futu reya fire di, ogõ are futu reya fire, age fe di, barisa are futu reya fire. Barisa idi atuneg futu reya fire fire ado.

<sup>42</sup> Age fiya gen, tamo gare den anidi neid mata kel fãya areg age foug. Bouwa tu fiyaf nē are bura le di, bouwa kel fã yef nē are to bura ledig.

<sup>43</sup> Sane bun tu fiya di, fula fiya medeĩya bun kel fã yef. Totol sã tu fiya di, totol ado kel fã yef.

<sup>44</sup> Bouwa buru maug are tu fiya di, uur nē bouwa are kel fã yef.

Bouwa buru maug ibodok are, uur nē bouwag ibodok.

<sup>45</sup> Anĩ nigin, Negur nē Itotoya bun eig ye irok, “Uyulil inon tamo Adam ĩ mata ibodõya wõ yen.”<sup>‡</sup> Idikeleya Adam ĩ mata ifenēya nē uur wõ yen.

<sup>46</sup> Uur nē bouwa ketem to isin, anĩ ere, bouwa buru maug ketem isin. Age fe di, anĩ dumen, uur nē bouwa.

<sup>47</sup> Uyulil inon tamo are tenebur aas nē, anĩ dõ fiya tamo are saa ilun nē.

<sup>48</sup> Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal

---

<sup>‡</sup> 15:45: Jenesis 2:7

gen.

<sup>49</sup> Ada tenebur tamo inon age fiya tabodok gen, adag tamo saa ilun tamal age fiya tabodōf.

<sup>50</sup> Turau tar, aya ã arokeneik, are tenebur nē bouwam Negur nē tano to akorou youf. Ereb bura ledig anīg to bura lauf anī to akorou youf.

<sup>51</sup> Karī wog, aya waa taka arokeneif: Ada ganan to gare tauf, anī ere, ada ganan bouwada falei foug,

<sup>52</sup> are ereb fili yeleya be, mala kamisāya gen idikeleya nē taur aitouf bun, bouwada agef falei foug. Taur aite di, tamo gare den anidi kel turī fedi di, to buraya nē ado fā douf, age fe di, ada bouwada falei foug.

<sup>53</sup> Are, buraya nē anī to burauf nē anī ifonūf. Laa fiya nē anī to laa foug nē anī ifonūf.

<sup>54</sup> Buraya nē anī to burauf nē anī ifonūf, laa fiya nē anī to laa foug nē anī ifonūf sain anī bun, Negur nē Itotoya bun ibodok enei agef kisi fel wō youf, “Negurem kusī bun laa wal fe fen, anī adok itob len.”§

<sup>55</sup> “O laa, ogon kusī wal fiya nē megeir nain?

O laa, ogon waila nain?”\*

<sup>56</sup> Laa nē waila are mosor, mosor nē megeir are lo.

<sup>57</sup> Anī ere, Negur de tafiyēf! Ī neda Odug Jesus Kristus bunem kusī wal fiya ifanadadig.

<sup>58</sup> Anī nigin, neu turau tar oboiyou, totol ufareg. Ereb takam to yokū yeif. Faimud Odug nē kabī fatuk bagai walogouf, ere nigin, ã keleī, are ã Odug bun kabī walegef anī, ege to ilauf.

---

§ 15:54: Asaia 25:8 \* 15:55: Hosia 13:14

## 16

### *Negur Nē Tamo Kayau Isennēdiya Nigin Kolekta*

<sup>1</sup> Gama Negur nē tamo kayau isennēdiya nē kolekta nigin, ereb aya Galesia sios age difouf nigin arokenēdin anī ago gouf.

<sup>2</sup> Uub ganan nē naa matu bun, ā mugu mugu, augeneī moni walegedig anī foig, fire unog fen, kuru gouf, anī bunem, sain aya asiyouf bun, kolekta baban to unogouf.

<sup>3</sup> Sain aya wō auf, tamo ā ugirnēdigen anidi bun, pas afeneīd fen, āgenei ege luwa ado Jerusalem sur afediyouf.

<sup>4</sup> Ayag idi geid ileya nigin deuf are, idi aya geid weim malauf.

### *Pol Nē Wau Irōya*

<sup>5</sup> Aya Masedonia provins atu atu ele fen, ā gein asiyouf, ere nigin, aya Masedonia atu atu alauf.

<sup>6</sup> Aya ā geid sain naal tabodōf be, yau ado menig sain bun ā geid tabodōf, anī bunem, ā neu iyōya nain be alauf bun usennagauf.

<sup>7</sup> Aya gama ā ailiyei ken, sain naal ki yeīya anī to orouf. Odug yo youf are, aya sain naal meluk ā geid tabodōf anī wau irok.

<sup>8</sup> Anī ere, aya Efesus ein abodok ele, Pentikos naa wō youf,

<sup>9</sup> ere nigin, kabī kaū ado nē sukar odug, aya bun kā fen, age fe di, musei aya kiwai difanaf.

<sup>10</sup> Timoti isiyouf are, ī ā geid ibodōf bun, ī ereb taka nigin to kumī youf nigin lo welegei, ere nigin, ī aya gen Odug nē kabī faali fef.

11 Anĩ nigin, taka nem ã yaleya nigin to itorõf. Yogon delẽ bun wau inosiya ado sur wiyẽge di, ã aya gein kel isiyouf. Ì tura tar geid disiyouf nigin, aya ololo afedif.

12 Neda turada Apolos nigin, ã tura tar geid ã gein dilauf nigin, aya total bagai arokenen. Ì gama ileyã nigin wau yenẽya sã, anĩ ere, ã ileyã nigin sain biya isiyouf are, ã ilauf.

13 Lo welegei, momoiya bun total ufareg, tamo total ado kumĩ sã wõg, total waleg.

14 Ereb ererb ganã wau laa fiya bun ago gouf.

15 Æ keleĩ, are Stefanã nẽ ibor, Akaia provins oun uyulil momoiya tamo kayau wõ de fen, idi dogo neid oroya dõ de, Negur nẽ tamo kayau disennẽdiyof nigin, kabĩ total daledig. Turau tar, aya total bagai arokeneik,

16 are ã eneidi age fediya ado, idi ganã kabĩ bun disi fen, kabĩ dalef anidi farumen ubodõg.

17 Sain Stefanã, Fotunatus ado, Akaikus wõ den, aya wau al fen, ere nigin, ererb ã bun tamal ifanamãya anĩ, idim ã fotokar difanaman.

18 Are, idi age dife di, neu uur ado ãgeneig filolõ fen. Anĩ nigin, tamo age fediya nigin de fiyẽdiya nẽ kisi walogouf.

### *Idikeleya Nẽ Aanya*

19 Asia provins bun sios idi, ã bun aanya sur difef. Akwila Prisila ado aanya, wau sere fiya ado Odug bunem ã bun sur difef. Sios idi neid fõ bun guru difedig idig age difef.

20 Ein tureĩ tar ganã ã bun aanya sur difef. Æ abob aan wiyẽg fen, fateul bunem umã gouf.

<sup>21</sup> Aya, Pol imaum bagai aanya enei atotof.

<sup>22</sup> Taka ã Odug nigin wau to laa foug are, isisĩa ã bun isiyouf. O Odug, usi!

<sup>23</sup> Odug Jesus nẽ wau ifenẽya, ã bun ibodõf.

<sup>24</sup> Neu wau laa fiya, Kristus Jesus bunem ã ganan bun ibodõf. Momoi.

**Mata Ifeněya Ně Od**  
**The New Testament in the Marik Language of Papua**  
**New Guinea**  
**Nupela Testamen long tokples Marik**

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

**The New Testament**

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

---

PDF generated using Haiola and XeLaTeX on 18 Apr 2025 from source files dated 31 Aug 2023

d7099f9d-3bdf-5620-8eb3-7e6c51cab7ea